

NKINGURIRA

Ibyahishuwe 3:20

Muri iki gihe abenshi mu baturage bafite amazu akingwa. Iyo bagize aho bagana basiga bakinze ngo hatagira akabononera. Ubundi kandi n'iyi bahari, barakinga kugira ngo hatinjira ubonetse wese, ahubwo hinjiremo ukwiriye.

Ubusanzwe hinjiramo abo bazi, abavandimwe, inshuti, abaturanyi, abashaka icumbi, cyangwa se abandi baheraniwe bashaka ubufasha n'inama. Uyu muni wo, Kristo ni we ukubwira ati: «**NKINGURIRA!**» Umva uko akwiringa: «Dore mpagaze ku rugi ndakomanga. Umuntu niyumva ijwi ryanjye, agakingura urugi, nzinjira iwe dusangire.» *Ibyahishuwe 3:20.*

Yesu ntakomanga iwawe agushakaho inyungu, cyangwa se ashaka kukononera. Ahubwo arashaka kuguha amahoro atagira impinduka. Arashaka kuguhumanura amahumane wahumanijwe n'ibyaha n'ubugoryi n'ubugome byawe. Arashaka kukuyobora kwa Se ngo uhabwe ubugingo buhoraho. Ubwe arivugira ati: Niye nzira n'ukuri n'ubugingo, nta ujya kwa Data ntamujanyye. *Yohana 14:6.*

Pawulo amaze kumenya ibyiza Yesu adufitiye, yavuze yeruye ati: “Ni we mahoro yacu.” *Abefeso 2:14.* Nuko rero niyo mpamvu akwiringa akomeje ati: **NKINGURIRA!** Arakomanga ku rugi rw'umutima wawe. Arashaka kwigarurira ibitekerezo n'imigambi byawe ngo abe ari we ubigenga.

Arakomangisha Umwuka we Wera, uhora agushyira ku nkeke kugira ngo ucike ku ngoyi y'ibyaha byakubase. Arakomangisha Ijambo rye ryera kuko ryo kuri, umucyo, umuriro ukongora ibyaha, ni inyundo imenagura imitima yinangiye imeze nk'ibitare. Zaburi 119:105; Yeremiya

23:29. Akomangisha ibyiza akugirira n'imigisha aguha, cyangwa amagorwa agukuramo, akomangisha umutima uhana ujya uvugana nawe iyo rubanda bamaze kwitahira. Umva rero, niba ushaka amahoro, **MUKINGURIRE.**

Ntukibagirwe yuko umunsi akomangaho witwa uyu muni; kandi ko isaha akomangaho yitwa uyu mwanya. *Abaheburayo 3:7.* Iyo ni imiburo y'umunyabyaha urama igihe gito, agakenyuka. Uramutse ushatse gukomeza kubirazika ngo uzaba umukingurira ejo, haba ubwo wagira utya ugasanga wakuwe ku isi y'abazima. Nuko rero mu gihe ukiriho, ukibasha gutekereza no guhitamo, umwumve kandi umwemerere ubwo akubwira ati: **NKINGURIRA.**

Arakureba uri mu nzira ebyiri wabuze uko wamasha ngo uce iburyo cyangwa ibumoso. Aguhanze amaso usinziririyeye mu by'isi bigushukashuka. Urakomeza kumushavuzwa wanga kuva ku k'ejo nk'aho uzatura nk'umusozi. Arakumva uhiga ibyo uzakora, n'ibyo uzagirira abantu, maze bikamutera agahinda kuko atari we ugutuyemo ngo atumire ibyo byose. Niba nawe umushaka emera uku kwiringa kwe akubwira ati: **NKINGURIRA.**

Uramenye ntiwange kumukingurira: Iyo wanze ukingurira Yezu inshuti yawe magara, ubwo ukingurira ukuzuzamo agahinda gasaze.

Iyo wanze guturwamo na Soko y'ubugingo, uturwamo na Rupfu na Kuzimu, maze umutima wawe ukaba urutare, wakora icyaha ukanezerwa nk'uwataye umuruho.

Mu gihe cya Yeremiya ni ko abantu bari bameze. Reka dusome: Mbese nta soni bagize bamaze gukora ibizira? Oya, haba no guhongana mu maso. *Yeremiya 6:15.* Uramenye rero ntiwange kumukingurira dore ntiwange

kumukingurira dore ni wowe yinginga ati: **NKINGURIRA.**

Reka nkubaze wa musomyi we! Mbese uremera kumukingurira? Mukingurire uyu muni, ntuzuyaze kuko utagomba kubaririza uwo ari we kuko atagira amayobera.

Ni wa munyarukundo rutagira akagero. Ni wa munyambabazi wishimira kubabarira. Ni wa Munyampuhwe ukuzaniye ihumure. Ni wa Mucunguzi wawe, waguciye ku ngoyi y'ibyaha byari byaratumye ucana umubano na Se.

Ni Kristo wakubambiwe ku musaraba w'i Kalvari, kandi amaraso ye ni yo ashaka kukuhagiza ngo agutsembeho inenge zose z'ibyaha. Nuko rero nshuti, dore aho yakwiringiye kandi akubwira ati: “Umuntu niyumva ijwi ryanjye, agakinura urugi, nzinjira iwe dusangire.”

Nuko rero muvandimwe muri Kristo, ntugumye kumushavuzwa, ahubwo, **MUKINGURIRE.**

ओॐओॐओॐओॐओॐओॐ



Tel: +250 786 873 047

E-mail: info@jyenayesu.org